

PREMIO PADU DEL CARIBE '97 LO BAY TA UNO HAMAS VISTO..

Otro siman lo publica e lista di e nomidadonan..

Fotos y Texto : Poets.

** Preparacionnan ta den full swing pa dia 26 di april proximo. Cas di Cultura bisti di gala pa e prestigioso PREMIO PADU DEL CARIBE '97. Tur cos ta muestra cu e magno premiacion aki cu ta hiba e respetable number di nos heroe artista nacional, Padu "Del Caribe" Lampe, lo bay ta uno hamas visto presenta aki na Aruba y Antiyas.

E produccion lo ta den man di Standing Ovation, kendenan ta trahando hopi duro pa duna e magno premiacion aki su toke di elegancia, cual lo ta uno digno di credito pa garga e distinguido number di PADU DEL CARIBE, nos querido Co-Autor di nos Himno Nacional, pa cual e merece cu tur honor.

E mahestuoso premiacion aki lo inicia pa 6'or di atardi y lo finaliza pa 8:30 di anochi y lo ser transmiti live pa Tele Aruba canal 13. Cas di Cultura lo ta reserva pa solamente e nominadonan, miembronan di prensa y demas patrocinadonan, pues lo no bay tin caarchi na venta.

Durante e grandioso anochi aki lo otorga 26 premio, cual

entrenan lo bay tin premionan special di merito pa e personahenan farandulero cu mas a duna nan aporte valioso na nos cultura musical durante aña 1997.

Pa otorga merecidamente e artistanan cu mas a sobresali durante aña 1997, un sondeo rigeroso den un forma honesto y sincero, a ser realiza cu varios personahenan clave den e mundo di farandula, kendenan a sigui henter e desaroyo farandulero di hopi aserca durante aña 1997. Premio PADU DEL CARIBE '97 lo ta uno selectivo y sin duda lo ta un honor y orguyo pa un artista ser galardona pa un premio di tan prestigio manera PREMIO PADU DEL CARIBE. Otro siman lo publica e lista di e nominadonan.

E maximo premiacion aki lo bay sirbi como un motivacion y estimulo grandi pa nos artistanan y tambe un inspiracion bibo pa nos futuro artistanan. kendenan sigur lo bay lucha pa un dia mira nan soño ser cristaliza pa ricibi e prestigioso

PREMIO PADU DEL CARIBE.



**** Aki por aprecia Padu del Caribe tras di su piano, acompaña pa su musiconan; Mario, Papito, Doedel y Ebby. kendenan ya ta preparando pa duna un show di kita sombre durante e grandioso anochi di PREMIO PADU DEL CARIBE '97..**

DEN AMBIENTE

E meta mas grandi di Premio Padu del Caribe..

PA ARUBA TA E PAIS DI PREMIACION MAS GRANDI DI CARIBE..

** E meta tras di e Premio Padu del Caribe, ta pa den futuro haci e premiacion aki esun mas aprecia den henter e region caribense y Latino Americano. E intencion ta pa otorga premionan na e artistanan y bandanan caribeño y Latino Americano cu mas a sobresali aki na Aruba. Esaki lo bay ta conhuntamente cu nos artistanan local, cual sin duda lo bay sirbi como un bunita intercambio cultural musical entre e paisnan caribeño y latino americano. Naturalmente den futuro

Aruba lo bay saca hopi probecho turistico y tambe riba tereno musical for di e premio aki. Tras di e meta aki tin un otro meta mas grandi, cual ta pa transmiti e premiacion di Padu del Caribe pa henter e region caribense y Latino Americano, cual lo bay sirbi como un otro promocion pa nos pais turistico. For di seis aña caba DEN AMBIENTE ta soñando cu e meta aki. Pa concretiza e meta aki mester di mas apoyo y confianza di nos comerciantenan, kendenan tin e poder den nan man pa haci

esaki posibel. Pero cu fe den Dios, poco poco e soño aki ta mirando su luz. E organizadornan di PREMIO PADU DEL CARIBE, ta haciendo lo maximo pa trece un produccion di un calidad extraordinario pa asina duna realse na PREMIO PADU DEL CARIBE. Pa haci esaki posibel, mester di ayudo y cooperacion di nos comerciantenan. Cultura di un pais ta di vital importancia, pasobra..UN PAIS SIN SU CULTURA, TA UN PAIS SIN HARMONIA Y SIN FUTURO..

Autor di "Rosa Laga Jan Bai"..

PREMIO PADU DEL CARIBE '97 LO RINDI HOMENAGE NA ANNA THODE DI BONEIRO..

** E aña aki pa prome biaha un artista di Boneiro lo ser homenogia durante e magno anochi di PREMIO PADU DEL CARIBE '97. E honor a toca pa ANNA THODE merecidamente ricibi e distincion mas halto di Premio Padu del Caribe, cual lo ta un premio special como homenaje. Alaves cu e bunita gesto aki lo sirbi pa estrecha e lasonan cultural entre Boneiro y Aruba uno mas fuerte.

Anna Thode pa su edad tan respecta keto bay ta cosechando exitonan grandi y aña pasa el a marca-historia cu su tremendo hit "Rosa laga Jan Bai", cual e aña aki a causa furor durante e carnaval di Corsow, te cu hasta tur e bandanan popular di Corsow mester tin e cancion aki den nan repertorio.

E gran dama folklor tin mas cu 33 aña den farandula. Na aña 1965 el a cuminsa canta simadan den e bario di Rincon y keto bay ainda e ta deleitando su pueblo Boneriano cu e tradicional simadan. Ann Thode ta e unico dama for di su epoca, cu te ainda ta activo den farandula y ta un di esnan clave cu a mantene e cultura musical bibo. Hasta por bisa cu Anna Thode a rebiba e mundo di folklor cu su tremendo hit "Rosa Laga Jan Bai".

Tambe Anna Thode ta domina e bunita arte como escritor y a skirbi diferente buki manera e.o. Palabra Cora cu sinta



bërde, Palabra na Ranka, "De Todo un Poco" y Flor di Hubentud.

Anna Thode nunca no a canta pa gana placa, cantamento pa su persona ta djis un placer pa di e forma ey e por sinti su mes contento y loke e gusta masha hopi mes, ta baila sin fin. Den varios ocacion Anna Thode a canta pa e inolvidable Tipico Boneriano. Tambe Anna Thode a canta cu varios grupo di Aruba.

Anna Thode a forma parti cu varios gruponan popular manera Foyan Boys, Grupo Watapana, Piedra di Bonaire y tambe como gueststar di Gibi y Orquesta. Dos aña pasa Anna Thode a causa furor aki na Aruba hunto cu Piedra di

Bonaire, na unda durante e grandioso evento turistico Bon Bini Festival den Fort Zoutman, Anna Thode a hala hopi atencion y admiracion serca e turistinan, kendenan a duna Anna Thode un standing ovation pa su formidable actuacion.

Ta un placer y admiracion pa cada biaha mira Anna Thode den su formidable actuacion. Apesar cu e tin un edad hopi respecta, su forma energetico di presenta ta causa realmente un sensacion serca e publico.

Ta un honor pa durante e anochi di PREMIO PADU DEL CARIBE '97, Aruba rindi un homenaje special na e gran dama Boneriano ANNA THODE..